

GEORGIUS VON...
CHIEVE VAI...
1782



V. 07/12


alte Nr. 128.

Pappus, f. in. noch

12 andere Schriften.

K. IV. 43.





Kurtze Antwort
Auff

Doctoris Selnetteri

Liederlich Tractetlein / das ohn-
langst wider Danaum vnd Iofuam
Lagum außgangen.

Gesetzt

Durch Paulum Schönhouium.

Prou. Salom. Cap. 14. ver. 5.

Ein trewer Zeuge leuget nicht / aber ein falsche Zunge
redet dürstiglich lügen.



Gedruckt zu Newstatt an der Hardt / durch
Mattheum Harnisch.

1581.



Alte Handschrift
1715

Alte Handschrift

Alte Handschrift
Alte Handschrift

Alte Handschrift

Alte Handschrift

Alte Handschrift

Alte Handschrift



Alte Handschrift

Alte Handschrift





Swil D. Schnecker wider aller
welt danck schlecht David sein/ Nun man
gelt ihm es an den fürnemsten/nemlich/das
er nicht die Söhne Jeruia bey ihm hat/ D
wie bald wurd er Abisai lassen lauffen/vnd
denen die Köpff lassen abreißen/ von denen
er nicht mit Steinen/sondern mit solchẽ Argumenten getrof-
fen/das ich glaube/er habe von der selbigen etlich den schwindel
bekommen/darüber er / wie ich höre/ sehr klagt/das/wo nicht ein
sonderlicher ranck erdacht / het man müssen den schönen Pres-
digstul etwas seinet halben niedriger setzen. Ich hab aber leider
sorge/ es plage ihnder Schwindel nicht allein auff der Kanzel/
sondern auch daheim in seinem Museo / auß welchem solche
Scharteck en fliegen / die ein anzeigung sein seines schwachen
zerrütten gehirns. Vnter andern flattert die faul antwort / die
er wider Daneum vnd Lagum gestelt / also liederlich zusam-
men gestoppelt / vnd vnter einander geworfen / das mich der
schönen Statt Leipzig / darin so viel gelehrter Doctorn vnd
Studenten/ so vil ehrbare verstendige Burger/ erbarmet/das
sie mit einem solchen Superintendenten versehen sein. Vnd
lest sich schier ansehen / als wenn nun bas die Propheeyung
Herrn Philippi erfüllt/der offte/wenn er Schneckers/ von dem
er dick vberlauffen/ los worden/zu sagen gepflegt / Væ illi Ec-
clesiæ, cuius hic aliquando pastor erit: Wehe der Kirchen/
daru der gesell einmal Pfarherr sein wirdt. Denn Philippus
als ein hoch verstendiger/leichtlich auß seinen heuchlerischen
geberden / auffgeblasener vnd ehrgeiziger demut gesehen/was
daruon mit der zeit zugewarten. Wie wol der Kirchẽ zu Leipzig
sey / kan ich nicht wissen / doch berichten mich glaubwürdige
leute/ er habe also hauff darinn gehalten vnd noch / das ihr vil/
fürnemlich vnter den gelehrten / seiner vber ein zeitlang mit
grossen schmerzen gedencen werden. Unser HERR Gott
A 2 behüte

Behüte die Politicos/denen er/wie ich hör/auch drawet. Vnd
 ist hie wol zubedencken / wie so gar vol Christlicher lieb vnd
 sanfftmüt Selnecker sey/welcher/wann er gute leut mit glats
 ten Worten/oder auch drawen/ins garn geführt/darauff sie sich
 one Verlesung jres gewissens schwerlichen zuwindē wissen/als
 bald drauff sein frewdē schuß gehē lest: Turba prius sublimia
 spirans &c. Facit omnia seruet vt offam: Gibt also zuvers
 stehen/das die gute Herren der suppen halben subscribirt/nicht
 der warheit zum besien. Ob das nicht ein Teufflicher schas
 denfro sey/darff nicht vñ fragens bey gutherzigen leuten. Dis
 sey also mit wenig Worten zum eingang gesagt. Nun wollen
 wir kürzlich des Herren Doctors Antwort oberlauffen / vnd
 was Danæum anlangt/wird er vielleicht selber / oder ander für
 in/Selnecker außfürlich zu seiner zeit antworten/Weil er aber
 ein Franzos/vnd der Teutschen Sprach nicht mechtig / kan es
 nicht schaden / das man an den Herren Doctor seinet wegen
 ein kurz Apologiam stelle / Vnd so sich sein achtbarkeit wei
 ter bescheidts zu erholen gesinnet / dieselbig auff die Teutsche
 Erinnerung der Pfelsischen Theologen weisen.

Erstlich bezüchtiget Selnecker Danæum einer grewli
 chen Lügen / dieweil er geschriben / das der HERR Christus
 im heiligen Abendmal mit seinem Leib vnd blut / so fern vnd
 weit vom gesegneten Brot vnd Wein sey/so weit der Himmel
 von der Erden ist. Hui lügen maul / spricht er / heist das des
 HERR Christi wort vnd Testament behalten / da der
 HERR saget/ Nemet/esset/das ist mein Leib / trincket / das ist
 mein Blut / Hie kompt nun der verzweiffelte Danæus, vnd
 spricht/nicht also / denn der Leib ist nicht da / das Blut ist nicht
 da / sonder es ist lauter Brot im Brot / vnd lauter Wein im
 Wein/ Das ist die bezüchtigung Selneckeri. Nun meiner ein
 falt nach / wenn Selnecker Danæum anklagen wolt / als ein
 Testament verfelscher / solt er billich die accusation also ge
 stele

5
stelt haben: Danæus der leugnet / dz das brot der Leib Christi / er
verleugnet / daß der Wein das blut Christi sey / darun̄ behelt er
nicht das Testament des H̄ XXX. Wenn nun das erst bes
wiesen / so wirdt das ander wol folgen / Aber Selnecker wirdt es
weder bey Danæo, noch bey der vnsern einem finden / daß wie
die wort Christi verleugnē / Das brot ist mein leib / Aber da sa
gen wir nein zu / daß er gesagt hab / da / oder im brot ist mein leib.
Darun̄ daß die Sacramentirer Christi wort verleugnē / ist nit
so wahr vnd gewiß / so wahr als Christus Allmechtig vñ wars
hafftig ist / nach des Selneckers rede / sondn so warhafftig Sels
necker geschriebē / dz der Josua Lagus tod sey / der noch im lebē.
Ist aber das nit zu erbarmē / daß der Herr Doctor in so vil Jas
ren her noch nit gelehrnet / daß vnterschiedliche reden vnd weit
vñ einander seind / Das brot ist mein leib / vñ / Da / oder im brot
ist der leib. In der ersten rede wirdt gesagt / von dem brot / daß
es der leib sey / In der ander wirdt gesagt / von dem leib / daß er im
Brot sey / Daß solche zwo redē eins sein / kan ich nicht glauben /
vnd wenn sie gleich alle Bier oder Weinkandten / alle Has
berseck vnd Wiegen herbrechtten / Denn ein ding selbst sein / vnd
ein ding in sich haben / nicht einerley red vnd meinung ist / wie
Kinder von sieben Jahren verstehen können.

Ich muß aber hie den Herrn Doctor ein wenig auff
halten / dieweil er bocht / vnd vorgibt / er bleib bey den Worten /
nicht seinethalben / sondern den einfeltigen zu gut / die diß lesen
möchten. Die wort Christi lautē / Das ist mein leib / Nun frag
ich den Herrn Doctor / Welchs dann dasselb DAS sey / sagt
er / eben das sichtbar brot vñ Wein selbst / sey der wesentlich / na
türlich Leib Christi / so mag er zu seinem Landt franco, oder
gar ins Franckenland gen Würzburg ziehen. Dieweil ihm
aber das vieler vrsachen halben bedenklich vorkommen würde /
so sage er nun zum andern wz dasselbig / DAS / sey / Ich halt /
wirdt er nicht wollen Landtfränckisch seyn / er werde müssen

mit Luthero bekennen / wie sawr es ihm ankomme / daß der
 H E X X nichts anders dann das sichtbar natürlich Brot sei-
 nen Leib genant. Mit was durst darffer nun sagen / daß nicht
 das brot / sondern das neben dem brot / oder vnter dem brot / oder
 im brot / vsichtbar in munde genommen werde / das sey der
 Leib Christi? Heist das bey den worten des H E X X X
 bleiben?

Weiter muß ich den Herren Doctor fragen / dieweil er
 so richtig auff Quæstiones respondiren kan / was doch eigenta-
 lich heisse / bey den worten des H E X X X bleiben / Heist es die
 wort stracks in ihrem eigentlichen vnd natürlichen verstande
 annemmen? Ich halt / der Herr Doctor sag ja darzu. Nun
 weiß einer also schliessen wolt / Das brot were für vns am stam
 des Creuzes auffgeopffert / was wolt der Herr Doctor sagen /
 sintemal eigentlich (wie ers haben will) zu reden / das brot der
 Leib Christi ist / vnd nichts anders am Creuz denn der Leib Chri-
 sti auffgeopffert? Ich glaube der Herr Doctor schüttelte den
 Kopff / vnd erkenne das für ein grewliche Gottslesterung / vnd
 wird gedrungen zu zugeben / man müsse die wort nicht verstes-
 hen wie sie lauten / er wolte denn zu dem Paphumb / von dem
 er so weit nicht ist / dieweil er sich nun mit dem Landtfranco be-
 hülfft / vñ dem Berengario so auffsetzig / trete. Vnd mögē die
 Herren von Leipzig wol zusehen / was sie für einen Supers-
 intendentē haben. Den weil er der meinung Berengarii zu wis-
 der / vnd es mit dem Landtfranco einem Päpfler helt / So köns-
 nen auch die Layen zu Leipzig / nicht allein die Doctores schlies-
 sen / daß Selnecker im grundt ein Papist sey / was die Contro-
 uersiam vom Sacrament anlanget. Ich möcht wol hören /
 wenn ihm das von einem hochweisen Raht für gehalten würd /
 was er darzu sagen wolte.

Dieweil man nun bey den Buchstaben vnd laut der
 wort nicht bleiben / sondern bey derselben meinung vnd vers-
 stands

standt/ ist nun die frag weiter/ auff waserley weise man zu dem
 selbigen kommen möge? Ich halte es sey vnter vns kein streit/
 man muß denselbigē also suchen/ daß die außlegung mit den Ar-
 tickeln des Glaubens/ mit der ander lehr von Sacramenten/
 vnd mit der erklärang/welche die Schrifft vber die wore Chris-
 ti selber giebet/ vber ein stimme/ vnd darauff möge erhalten
 werden. Weis Selnecker was anders/mag ers sagen. Ob nun
 vnser außlegung diesem allē gemess/ lassen wir alle glaubige in
 der Christenheit vrtheilen. Dann Gott lob/dieselb also geschaf-
 fen/ daß sie an keinen Artikel des Glaubens anlaufft/ noch
 der selbigen einen verkeret oder vertunckelt/ oder deren etliche in
 einander menget/ auch die weiß vnd art/ die inn allen Sacra-
 menten gebreuchlich/ behelt/ vnd mit der stiftung vnd erklä-
 rung des Apostels Pauli vnd andern also zutrifft/ daß die wis-
 dersacher noch zur zeit/ das widerspil nicht haben können be-
 weisen. Vnd trus sey Selnecker vnd seinen Consorten/ daß sie
 es beweisen.

Diemeil aber diß alles in der vnsern Schrifften statlich
 vnd gründlich außgeführt/ acht ich vnnot/weitleufftig solchs zu
 widerholen/ allein wil ich gemeine Layen diß erinnert haben/sie
 wöllen doch dem Schwindelgeist inn allem nit so beyfal geben.
 Selnecker vnd sein hauff schreien mit grosser vngestümm/ die
 wort seyn hell vnd klar/ vnd dörfen keiner glossen. Diß nemen
 wir für bekant an/vñ erklären diß den einfeltigen zu gut/ mit dis-
 sem gleichnuß. Wenn ein Vatter/ der viel Kinder het/ auß die-
 sem jammerthal abscheiden solt/ vnd sein gelt vnter reich vnd
 gewiß leut verlihen/ doch also/ daß er von einem jeden handts-
 schrifft vnd siegel genommen/ Wann er nun seine Kinder vor
 seinem ende zu sich berufft vnd ihnen die handschafft zeigt/
 vnd sprech/nemet/ vñ theilet euch gleich drauß/ das seyn meine
 sache/das ist ewer ertheil. Wer das nicht eine helle/klare vñ
 verstandige rede/welcher vnter den Kindern/ der nur vber zehen
 Jahr/

Jar/wolte dieselbige handschriften/als läre zettel verachten/
oder denckē/das das gelt in den brieffen wesentlich stecke/oder in
dem sigel verborgen? vnd wer ihnen gleichwol das gelt gewis
genug/wannes gleich zwey oder drey hundert meil daruon.

Wunder vber wunder ist / vnnnd werden sich die Nach-
kommen freisigen vnd segnen/vber der blindtheit solcher hochs
erleuchten Doctoren/welche/wen sie hören/ Das brot ist mein
leib/nichts anders sagen noch singen können/denn verborgen
im brot so klein. Dieses aberglaubens aber ist kein ander vrs
sach / dann das die hochgelehrten Herren Doctores etwas
mehr in Sacramenten denn im wort suchen/vnnnd die Sacra-
mentlich reden/vnd Sacramentliche vereiniung nicht vers
stehen noch verstehen wollen. Vnd ist es nicht zu erbarmen/
das ein Jud kan sagen/wie das Lamb der Vberschrit sey / vnd
ein Christ/ich geschweig ein Superintendens/vnd fürnemlich
zu Leipzig/der sol nicht wissen wie das brot der Leib Christi sey?
Bald spricht er/das brot sey der Leib natürlicher vnnnd wesents
licher weise / vnnnd weil dasselbige zu sehr nach dem Papsts
thumb reucht / so behelt er das wort Sacramentlich / vnnnd
saget / das das Brot der Leib Christi sey Sacramentlich/
Was ist dann nun Sacramentlich? Hie weichen die Herren
wider zuruck / vnnnd gedencken sich zuverschliessen / wenn
sie fürgeben / Menschlich vernunfft könne das nicht außs
gründen oder verstehen / Man hat hie nicht mit der vernunfft
zuthun / sondern mit Gottes wort / dem die vernunfft folgt
gen vnnnd zosen muß. Sie schämen sich nicht zubekennen / sie
wissen nicht was Sacramentlicher weis sey. Aber das würde
sich vnd solt sich Selnecker ins hertz nein schämen zusagen/ er
wüste nicht was Sacramenta weren / vnnnd wenn er spreche/
er wüßt es nicht / so solt man ihm billicher das Auditorium
zuschliessen / dann vor zeiten Victorino geschehen / oder ja
mit der Nasen in die Augspurgische Confession führen/ da
wirdt

würde er finden was Sacramenta seyn/ Nemlich sichtbarliche Zeichen der gnade Gottes. Ist nun derhalben einem Christen/ der diese Lehr von Sacramenten versteht/ leicht/ wann man in fraget was das brot im Abendmal sey/ zu antworten/ es sey ein Sacrament oder sichtbarlich zeichen des Leibs Christi/ oder sey der wahre Leib Christi Sacramentlicher weise/ ist eben so vil/ Vnd auß diesem ist leicht zu vernemen/ was die Sacramentlich vereinigung sey/ welche also von ihnen erkläret wird/ Es müssen die Irdische vnd sichtbare ding/ Brot vnd Wein/ vnd die Himlischen vnd unsichtbaren/ Leib vnd Blut Christi/ also vereiniget werden/ daß sie gleich ein klumpen/ vnd mit einander an einem ort seyn/ vnd mit einander in den Henden getragen/ vnd in den mund vnd Leib genossen werden. Dieweil aber solches alles der art aller Sacramentē zuwider/ könne wir vns nit auff jr meinung bringen lassen/ sie haben dann zeugniß auß Gottes wort/ vñ beweisung/ dz nach irer weiß zuredē/ der Leib Christi auch in dem Felsen in der Büste/ vñ mit dem Manna/ vnd in dem Osterlamb/ vñ den andern Opffern/ die geschlacht wurde/ Vñ das Blut Christi auch in dem Wasser/ das auß dem Felsen flos/ vnd in dem blut der Brandtopffern/ vnd in dem Tauffwasser Sacramentlich vereiniget/ vnd noch sey. Weil solches schwerlich von jnē zugewartē/ So bleib derweil wahr/ woz wahr ist/ Nemlich dz unnöttig/ dz die Zeichē wesentlich mit dem bezeichneten vereiniget werden/ wie solchs einfeltige Layen auß dem gleichnuß/ das wir droben angezogē/ leichtlich zu verstehen/ Dañ vnnot/ dz das gelt mit der Handschrift vñ siegel ein klumpen werden/ vnd ist gleichwol die Handschrift nicht ein nudum signum, sondern wann ich dieselbigen aufflege/ so muß mir mein gelt werden.

Ich möchte aber wol wünschē/ daß der Herr Doctor lehret/ was für ein vnterscheidt were/ vnter der Persönlichen vnd Sacramentlichen vereinigung. Dañ ob sie gleich in dem
 B mit

mit einander oberein kommen / daß inn beyden keine verendes-
 rung des wesens geschicht / So ist es doch weit ein ander redel/
 wann ich sprich / Gott ist Mensch / vnd wann ich sag / Das
 Brot ist der Leib / Denn in der ersten redt verstehe ich / daß zwo
 Naturen / die Göttlich vnd Menschlich inn Christo persönlich
 vereiniget / in der andern / daß brot vnd der Leib Sacramentlich
 vereiniget. Es ist aber die Sacramentliche vereinigung nicht
 also gestalt / daß die Sacrament oder zeichen / mit den dingen
 die sie bedeuten / natürlich oder wesentlich / wie kurz zuvor ge-
 melet / vereinigt werden / sondern darin stehet sie / daß / wenn
 wir der eusserlichen sichtbarlichen zeichen leiblich gebrauchen /
 wir auch geistlich durch den glauben der Himmlischen güter /
 die vns durch die Sacrament fürgebildet vnd versigelt / theil-
 hafftig werden. Nam Sacramentalis vnio, non Physica est
 aut localis, sed relatiua & spiritualis. Vnd wann das der
 Herr Doctor nicht verstehet / so solt man im billicher das Exa-
 men Theologicū, deñ er andern lesen / Doch also / daß im zus-
 vor D. Simonius die Logicam expliciret / vnd sonderlich die
 Doctrinam de prædicationibus, der würde ihn fein vnters-
 richtē / semper figuratam esse prædicationem, quoties dis-
 parata de se mutuo prædicarentur, welche art zu reden / der
 Schrift gar gemein / als / Herodes ist ein Fuchs / Die Jünger
 Christi seyn das Salz der Erden / Christus ist die Thür / der
 Weg / Jeshu. vnd wie hie geredt wirdt / Das brot ist der Leib /
 Hæc prædicata nemo nisi insanus dixerit cum subiectis
 propriè cohærere. Vnde euidentissimè apparet, prædica-
 tiones has esse figuratas. Was die inusitatam prædicatio-
 nem anlangt / wirdt er ihm auch seinen bescheidt geben / auß
 dem Thoma Aquinate, wieder Herr Doctor selbst / weil Si-
 monius noch zu Leipzig / von ihm / so er lust zu lernen / hören
 kan. Eins felt mir noch ein / daß ich inn seinen kunstreichen
 Anworten auff etliche Quæstiones, gelesen / das mir so spiss-
 findig

findig fürkommen / daß ich nicht gemeine / man köndt ihiger
zeit in der Teutschen Nation ein solch acumen antreffen. Er
gibet für / man nemme wol des HERRN Christi Leib leiblich /
doch nicht leiblicher weise / wol natürlich / doch nicht natürli-
cher weise / gleich als wenn Selnecker solch ding leppisch vors-
brecht / vnd doch nicht leppischer weise / schriebe viel ding lügen-
hafftig / doch nit lügenhafftiger weise / Er wolte es deñ also enes
schuldigen: *praesentia ineptiarum & mendaciorum*, sed
non modo inepto & mendaci, wie er saget / *praesentia cor-
porali*, sed *non modo corporali*.

Diueil aber der Herr Doctor mit den worten der
einsagung / so sehr vns gedencet zuschrecken / so fragen wir ihn
weiter / wie er doch das wort / *Edite, Esset* / verstehe / eigentlich
oder figürlich / vnd ober es auff das brot / oder auff den Leib des
HERRN deute? Versteht er es propriè, so mag er sich nicht
lange seümen / denn zu besorgen / wo er sich verspötet / er möchte
zu Capernaum verschlossen werden. Dann was Essen eigents-
lich heisse / halt ich / verstehen die Bawren im Kôlgarten wol /
vnd würde keiner anders sagen / deñ Essen heisse mit den zänen
zubeissen / kewen vnd verschlingen. Wil nun der Herr Doctor
der abschewlichen absurditet entlauffen / so muß er entweder
sagen / es sey ein figürliche redt / oder muß es von dem Brot als
lein propriè oder eigentlich lassen gesagt seyn / welches wir
wol zu frieden.

Diß seye also kürzlich / der einfeltigen Layen halben /
auff D. Selneckers anlag geantwortet. Allein das möchs-
te ich wol wissen / ob Danæus also geschrieben / wie Selnecker
anzeiget / Es sey im Abendmal nur lauter brot im brot / vnd
lauter wein im wein / Man findet solche reden bey den vnseren
nicht / vnd ich glaub / Danæus wirdt sich der auch nicht ges-
brauchen / Ich hab seine schrifften nicht / er oder andere wers
dens verantworten. Was die schmechwort anlanget / die hers
B 2 nach

nach folgen / so sehen wir sie zu dem vorigen Catalogo con-
 uitiorum & mendaciorum ipsius, sampt den anderen di-
 gressionibus, der er sich vnartig zugebrauchen pflieget / fürs
 nemlich wenn er auff hauptpunct / darumb am meisten der
 Streit/antworten soll/wie er den Kindisch genug in seinen re-
 citationibus dasselbige beweiset/in dem er alte Historien her-
 für bringt/von Maiore, VVinshemio, Furstero, Victorino
 &c. gleich als were der streit darumb / ob Lutherus oder Phi-
 lippus, VVinshemius oder Victorinus, Fursterus oder Crus-
 tiger/ Jonas oder Selnecker/Sacramentirer gewesen / da vil
 mehr sein achtbarkeit darauff rund respondiren solt / Ob der
 Leib Christi allenthalben/vñ Ob er mündtlich von Gläubigen
 vnd vngläubigen gessen werde / darüber ist der zank / das solte
 er alles/beydes auß Gottes wort vnd auß einhelligem Consens
 der vralten Christlichen Kirchen beweisen/ vnd darvon solte er
 seine refutation angefangen haben.

Er fehret weiter fort/vnd sehet / daß Danæus geschries-
 ben/die Exegetis, so zu Leipzig erstlich gedruckt/sene aller Sech-
 sischen Kirchen / oder aller Theologen / welche inn Sachsen
 vom heiligen Abendmal recht gelehrt / bekantnus / Psui
 Teuffel/spricht er/was leugst du. Ich halte D. Selnecker res-
 de mit seiner Tochter/die hat ihm vielleicht/wie den vielen ans-
 dern zu Leipzig/einen guten Abendt vom Satana gesagt / der
 danckt er villeicht also. Er hette sollen Danæi wort sehen / so
 wüßt man wie es geschaffen / denn seinem bericht ist wenig/wie
 in andern auch/zutrawen. Was hat dann Danæus für grosse
 lügen gethan/daß er gesagt/es seye aller Theologen in Sach-
 sen bekantnus gewesen/die da recht gelehrt/Siehet der herr D.
 nicht die exception (die da recht gelehrt) er hat warlich Selne-
 cker vnd seinen hauffen nit gemeinet / sonderen die da recht ges-
 lehret / vrsach/dieweil dasselbige buch kein ande lehr vorbracht/
 den die in Corpore Doctrinæ vñ des Herren Philippi schriftte
 gefast/

gefaßt/ vnd wer dieselbige fleißig gelesen / vnd recht verstanden/
 der hat der Exegesi nicht viel bedürfft / derhalben diß eitel lufft
 streiche seyn. Vber das / so hat Danæus fürnemlich auff die
 Sechsischen Kirchen gesehen / die sich auff das Corpus Do-
 ctринаe zu der zeit beruffen / vnd von den Flacianischen zu der
 zeit angefeindet / darumb Selnecker vnnot gewesen / etlicher
 Schrifften vnd Kirchenordnung meldung zuthun.

Zum dritten / heist er Danæum ein lügen maul / daß er
 ihm fürgeworffen / er habe helffenden Philippum verdammen/
 samit allen seinen Schrifften. Ob Danæus daran gelogen / kan
 ich nicht eigentlich berichten / Ich halte / die Anhaltischen The-
 ologen solten im gründtlicher bescheide darvon geben. Doch
 daß ich die warheit sage / der des Herren Philippi Corpus hat
 dürffen ein Corpus errorum & confusionum nennen / von
 demselbigen ist eine starcke vermutung / er dürffte es auch wol
 helffen verdammen / vnd auß der appendicula ist schier etwas
 zu vermercken / dieweil er Lutherum in die Kirch / Philippum
 aber allein inn die Schul weist. Weiter / so macht auch das
 den Leuten ein selzam nachdencken / daß er an seinen getrewen
 mitbruder geschrieben / Man köndte die Vniuersitet Leipzig
 nicht reformiren / nisi eijcerentur excrementa Camerarij &
 Philippi, man segte dann des Camerarij vnd Philippi wust
 auß. Warumb er dem Herren Camerario / Gottseligen / so
 auffsezig / hat mich sehr wunder / aber ich halte / es ligedem Her-
 ren noch im kropff / daß er ihn einmal liberè gestrafft / fast mie
 solchen worten: Extant aliorum scripta, extant & tua, ac
 valde miror, cùm tua legis, si te tui non pudet, das ist/
 Man hat ander leut schrifften / man hat auch deine / vnd mich
 nimpt wunder / wenn du deine list / daß du dich deiner selbest
 nicht schämest. Hie felt nun eine andere frage ein / wie es doch
 kom̄ / daß Doctor Selnecker das Examen Theologicum
 Philippi wider angefangē zulesen / welches doch auch im cor-

pore Doctrinæ begrieffen/ welches corpus er/wie kurz zuvor angezeigt / ein corpus aller irrthumb vnd verwirrung genennet. Weiter/wie ich höre/ so gedenckt er Doctor Pseffingers/ Salmuts vñ anderer / in allen ehren/die er zuvor auffshöchste hat helffen verkleinern/vnd wenn sie von Jacob Andrea auffseusserst veracht/darzu stille geschwiegen/Das seynd mir freye Heroes,die solt man nicht in der Kirchen/sonder auff der Kirchen zu Wetterhanen gebrauchen. Etslich/das er sich sehr bemühet in dieser seiner antwort/auch in seinen recitationibus, Philippum von vnserer seit abzuwenden / da ist er allein zu schwach darzu / er müste die andern Patres zuhülff nehmen. Was sonst die lügen / wie er redt / von Camerario/ Heidelbergschen Bericht / vñ Wolffij Historien anlanget / weil er nichts meldet/kan ich es auch nicht errhaten.

Zum vierdten/ meldet er / er wolte nicht die Welt nemen/vnd sich mit einer solchen lügen besuddelen/vñ schreiben/das der newe Wittenbergische Sacramentirische Catechismus Anno 1571. seye geschrieben/vñ in öffentlichen druck verfertigt worden/mit einhelligem bedencken der hohen Schulen Leipzig/Wittenberg/vnd dreier Consistorien/auch aller Superintendenten in allen Sechsischen Kirchen. Ich möchte wol wünschen/das jm auff das Pünclein Doctor Cruciger oder Pezelius antworten solten / er würde ein wenig die Pfeiffen müssen einziehen. Ich gebe es jm zu/das nicht alle drein gewilliget/vnd fürnemlich der Superintendenten zu Meissen/ neben anderen zwenen seinen guten Compen vnd Paten/doch haben sie es nicht hinderen können / vñ ist gleichwol gedruckt worden/das also omnes hie stehet pro maiore & saniore parte, wie gebreuchlich zu reden. Vnd so Danæus geirret/so irret der Doctor drey mal mehr / Denn zu Franckfurt / Rostock / vnd vielleicht in anderen Academijs mehr / haben nicht alle Professoren/sonderen allein die Theologi vnterschrieben/ derhalben

ben er nicht so sehr von allen hohen Schulen het dürffen glorisiren / vnd sonderlich von Leipzig vnd Wittenberg. Denn mit was grossen freuden die Professores beyder ort zur Subscription geeilet / wissen auch die Kinder auff der gassen. Vnd weil ich der Kinder gedacht / felt mir das ein / das Pericles von den Samijs hat pflegen zu sagen: Sie geben wol tribut / doch vngern / wie die Kinder bisweilen die Suppen / die ihnen nicht schmecket / wol essen / doch darzu weineten. Wie viel seynd ihrer wol vnter den Professoribus, die man nicht gleich mit den hasren zu der Suppen gezogen / vnd haben sie nicht wollen gestrichen werden / das ist / ihr Condition verlieren / so haben sie zur Suppen kommen müssen / wie sehr sie auch versalken gewesen. Hie ist aber dem Selneccero widerum eine newe frag auffzugeben / Er nennet den Catechismum Vvittebergensem ein Sacramentirisch buch / vnd dero wegen / nach seiner Censur verdamlich / Nun ist aber das Buch von wort zu wort auß des Herren Philippi seligen Schrifft gezogen / Were es nun eine todtsünde / wenn einer ein solchen argwon schepffte / Selnecker halte zu gleich auch des Herren Philippi scripta für Sacramentirisch / vnd verdamne sie? Das er aber darzu thut / es haben alle so vorhande seynd / in Kirchen vñ Schulen vermeldet / das sie schändlich seynd betrogen worden / vnd mit vnwarheit herumbher geführet vnd beschweret / solche klage hoffe ich / wirdt in kurtzen / wo es nicht schon geschehen / viel warhafftiger von Schulen vnd Kirchen geführet werden / ober ihren betrug / den die Pfelsischen Theologen also entdeckten / das wers nicht sehen will / mutwillig blind seyn muß.

Zum fünfften / nennet er das eine offenbare lügen / das Danæus schreibet / Ernestus Voegelinus sey durch Selneckers vnd seines gleichen tyranney / aller seiner güter beraubt zc. so es am tag ist / das Ernestum Voegelinum die Exegesis auß dem Land bracht / So weis ich nicht / warumb Selnecker den
Kopff

Kopff auß der schlingē ziehe/vñ für gebe/er habe keine schulde an
des Ernesti vnglück. Dann wer hat erstlich die Exegesen bey
menniglich grewlicher vñnd erschrecklicher irrthumb / doch
mit vnwarheit/ verdecktig gemacht? Hat es Selnecker nicht
gethan/so ist er ja nicht weit darvon gewesen/ vñnd mit raht vñnd
that darzu geholffen. Wo seynd nun die offenbare lügen Da-
naei? Ich halte genzlich / hette Selnecker dem Voegelino nie
herausz geholffen/er hülff jm noch heraus / weñ er im Land da-
rinn wer.

Zum sechsten/thut es Selnecker wehe/ daß ihm Dana-
us vorwirfft/ er seye auch vor zeiten ein Sacramentirer gewes-
sen/weñ die für Sacramentirer gescholtē/die der Vbiquitet zu
wid gewesen/So mag Selnecker mit Lindano expostuliren/
welcher in vnter die referirt/die der Vbiquitet schriftlich wider-
sprochen. Dieweil er aber Danaus sich auff zeugē berufft/ wil
ich mich nit weiter dareyn legē / allein Selnecker hette der lan-
gen Protestation nicht bedürfft/denn in seine Schriften new-
lich außgangen / wol auß dem verdacht ziehen vñnd entschuldiz-
gen/ Auch (Gott lob) könnē wir solcher leut als Selnecker ist/
in vnseren Kirchen vñ Schulen wol entrahten/ darumb er sich
nicht zu befürchten/als giengen wir darauff vmb / wie wir ihn
möchten mit list auff vnser seiten bringen / denn alles was
möglich / geschehen ist / vñnd doch wenig bey ihm verfangen.
Was weiter folget/ referiren wir zu dem vorigē Catalogo sei-
ner lesterung vñnd lügen / vñnd zu anderen seinen gewönlichen
digressionibus.

Nun komme ich auch zu des Lagi schmeckarten / den
also nennet er/ Selnecker / Lagi antwort / darzu er gedrungen
worden / so er anders nicht hat wollen vñder die verstorbenen
bey lebendigem leibe gezelt werden. An der Historia, der Lagus
meldung thut/saget er seye kein wort wahr / bekennet gleichwol/
daß er ein Monat lang Organist zu Wittenberg gewesen.
Daß

Das er aber mit Herman Fincken herkömmt/vñ will also die Historiam verdecktig machen/als weñs lügen weren / da thut er/wie in höhern dingen/wider sein gewissen/denn er sich wol zu erinnern/das sein Competitor ein Sachß gewesen/ vnd weiß er besser nachrichtung haben will / so spaciere er ein mal nach Wittenberg/ vnd frage nach einem/ Magister Johan Hagen genant/ zu Wittenberg bürtig/ der wird ihn sein vnterrichten/ vnd den Herren Doctor / doch mit gebürender ehrerbietung/ schamrot machen. Das Lagus weiter meldet / Selneckers seits ten weren alle dahin gezogen / das bey seinem leben kein Conscent oder Harmonia inn der Kirchen Gottes gehört werde/ darff nicht viel probirens / jederman beklaget sich der grossen trennung vnd zerrüttung / es schreyet jederman vnd seuffzet/ das doch die controuerfien möchten ein mal legitimè erörtert vnd hingelegt werden/vnd weren vielleicht vil gutherzige leut/ hohes vnd nidriges standes / darzu geneiget/ vnd leichtlich zu bereden/ wo nicht Selnecker vnd sein hauff mit hend vnd füßsen wehreten.

*Vel quia nil rectum nisi quod placuit sibi ducunt:
Vel quia turpe putant parere minoribus, & quae
Imberbes didicere senes perdenda fateri.*

Suchen die Herren Gottes ehr allein/vñ der warheit fortpflanzung/ so lassen sie dise ire gute Sach in der ganken Christenheit durch ein frey Colloquium kundt werden. Es merckens bey jnen auch schier die Bawren / das die Herrlein nicht so gar richtig/dieweil sie sich aller öffentlichē gesprech vnd vntersredung mit vns entschlagen. Was die Calumnien von der Sacramentirer meuterrey vñnd Blutbad anlanget/ referiren wir gleichsfalls/wie oben vermeldet/zudem Catalogo conuictiorum & mendaciorum Selnecceri, die bald ein sonders Volumen werden geben. Das er aber meinet/man solte jm die

C Collegas

Collegas nennē/ halt ich sene Lago jziger zeit/ viler vrsach wegen bedenklich.

Dieweil er aber von so grosser redligkeit rhümet/ möchte ich ihn wol fragen/ ob der auch auffrichtig vnd ehrlich handelte/ der mit seinem Collega, mit dem er alle Kirchen vnd Schulen solte helffen re/ oder deformiren / also umbgiengel/ daß/ wenn derselbige die Nase begossen/ vnd etliche wort im trunck lauffen ließ/ die da möchten gefehrlich außgelegt werden/ er dann sein guter freunde ein Schreibtefflein het/ zeichnet alles sein heimlich auff/ vnd vberantwortet es hernach versigelt an die örter / von dannen vngnad oder straff zu besorgen? Wer nun solches gethan/ vnd wem es widerfahren/ frag Selnicker selbst etlich Superintendenten/ fürnemlich ihm Weisnischen freiß / oder schreibe gen Tübingen / vielleicht kan ers von dem erfahren/ der vnlangeft an ein fürnemmen mann in Sachsen geschrieben/ Es were kein erger Judas verrähter/ beydes Kirchen vnd Schulen/ denn Selnicker/ der würde auch ein mal ein solch ende nemmen.

Seynd wir das nicht seine Concordien brüder? wie sich die andern Patres mit einander vertragen/ weis ich nicht/ allein von dem opere selbst ist landtruchtbar / daß einer auß ihrem mittel/ öffentlich dawider geprediget/ vnd sich beklaget / es sene nicht recht außgangen/ er wolte es lassen drucken / wie es rechte seyn solte / Hat es auch einen gestickten bettlers mantel genennet/ das den stich nicht halte. Der gute Chytraus, ich glaub alters halben / oder ob er sonst nicht das rechte Exemplar hat/ will von dem wörlein Condemnamus gar nichts wissen/ deß also schreibet er in einer Prefation newlich außgangen: se toto pectore semper damnasse & abominatum fuisse, eorum crudelia iudicia, qui omnes exteris Ecclesiis, reges, principes ac populos, de Eucharistia dissentientes, condemnent, & Diabolo tradant, aut minus Turcis & Scythi-

this

thiſ ferendos ſtatuant. Atque illa iudicia arbitratur in
nullius pij & ſani hominis mentem venire.

Ich halt Doctor Chytraus muß ſelten in des Docto-
ris Simonis Pauli predigten kommen / vnd Selneckers les-
ſterſchriſſten oben hin leſen / denn er ſie mit ſolchen worten
ſchwerlich wird erzürnet haben. Si enim illa iudicia in nulli-
us pij & ſani hominis mentem veniunt, neceſſariò con-
ſequitur de ſententia Chytræi, & collegam ipſius, & Sel-
neckerum, homines impios & inſanos eſſe. Daß aber
Selnecker weiter ſchreibet / man habe den vnſeren nie kein
freundtlich vnterredung verſagt / darauff antworte ihm Te-
rentius: Os durum.

Weiter ſagt er / Wer aber meuchliſch / heimlich / tückiſch /
Diebiſch mit Gottes wort hat ſpilen wollen / derſelbige hat
ihm ſelbeſt ſein vnglück zugezogen / Da ſticht Selnecker auff
die arme Wittenbergiſche Theologen / welche doch leichtlich
mit dieſer gleichnuß bey menniglich zu entſchuldigen: Wenn
ein Arzt einen beſcheidenen patientē hat / ſo gehet er mit der cur
ſeinrichtig zu / beredt ſich mit dem Kranken / ſaget was / wie
vil / vnd wenn er die Arzney gebrauchen / zeiget ihm darneben
vrsach an / warum er ſolche vnd kein andere arzney einnehmen
ſoll. Wann er aber einen Phreneticum curirt / oder ein junges
vnerſtändiges kind / von fünf oder ſechs Jahren / da muß er als
lerley liſt vnd geſchwindigkeit erdencken / wie er ihnen die heils-
ſame Arzney möge beybringen.

Hetten nun die Doctores zu Wittenberg beſcheidene
Superintendenten gehabt / mit denen ſie ſich ſein freundtlich
von etlichen hohen artickeln hetten könnē vnterreden / were der
Sachē bald abgeholfen gewest / nun aber / weil ſie der fürnem-
ſten ingenia vnd vngestümigkeit wol kanten / vnd doch gern
ſieneben anderen / von dem abergläubichen wohn der leiblichē
gegenwart im brot (welche der grund iſt / darauff des Papſts
grewel

grewel gebawet) abzuführen bedacht / wie denn auch von der vn
gehewrn Ubiquitet / die jñter neher vnd neher auß Schwaben
sich nahete / Habē sie erstlich die lehr vō der Person Christi rich
tig / gründlich / nach Gottes wort / vnd der vralten Christliche
en Kirchen Consens / erkleret / wie ihr Catechismus / Grundes
fest / Disputationes, das augenscheinlich außweisen / guter
hoffnung / es würden / denen die Sach ein ernst / ein mal die Aus
gen auffthun / vñ der warheit beppflichten / vnd algemechlich /
wan sie die lehr von der Person Christi recht gefast / den andern
abergläubische wohn fallen lassen / Solches / als etliche weltflu
ge verschlagene Theologen / denen an ihrer eignen existimation
mehr / dann an Gottes ehr gelegen / gemerckt / da ist das Tolle
& Crucifige auff allen seiten angangen / Vnd ich glaub genz
lich / es hab ihr viel / denen die warheit ihndt zu starck ins An
gesicht leuchtet / gereuhet / daß sie zu etlichen dingen vrsach
geben.

Das ist nun die grosse meuchleren vñ diberen / Die Wits
tenbergische Theologen haben Selnecker vnd seines gleichen /
wollen sein gemach zu der erkantnus der warheit führen / Daß
es ihnen gefehlet / vnd die cur nicht gerahten / muß man Gott
befehlen / dann auch biß weilen den klugste Erzten etwas miß
linget / vnd wie der Poet sein sagt:

*Non est in medicio semper releuetur vt ager,
Interdum doct aplus valet arte malum.*

Vnter deß bleibet Selnecker noch ein patient / neben anderen
seinen consorten / er stelle sich so frisch als er wolle / ja wie es die
Medici wol wissen / so ist's mit denen Patientē am aller gefehrs
lichsten / die ihre krankheit nicht fülen.

Daß er aber / Doctor Selnecker / der Maifestet sich abers
mal rhümet / vnd vnter dem namen seine vngewore Ubiquis
tet vertuschet / ist nichts newes. Aber sehe doch nur wer augen
hat / Wer redet von der Maifestet Christi herlicher vñnd tröstlis
cher /

cher/wir/oder Selnecker vnd sein anhang? Wir/sant vnser ar-
 tikeln des Glaubens/bekennen/das Christus in Himmel ges-
 fahren/Sitze zur Rechten Gottes/erzeige sich daselbest inn
 Himmlischer/Göttlicher Maestet vnd Herrligkeit/als ein
 H & X aller Creaturen/vnd das Haupt seiner Kirchen/
 durch welches der Vater alles erhelt vnd regiret/sonderlich
 seine Kirch mit dem heiligen Geist begabe/vnd schütze wider
 den Teuffel vnd alle feind/vnd solches alles nach beider natus-
 ren art vnd eigenschafften/wie weitleufftig inn der vnseren
 Schrifften außgeführt. Ist nun das nit ein herrlichere Maes-
 tet/den Leib Christi inn der Himmlischen Glori bleiben lassen/
 denn in das irrdische in auff's newe versetzen/ja an das brot des
 Nachtmals bindē oder reumlich einschliffen/vnd also mündt-
 lich mit dem brot auch den Gottlosen zu essen geben? Nam in
 hanc immani corpore pristim definit speciosa illa Nym-
 pha vbiquitas. Was nun das für eine Maestet/stelle ich inn
 eines jden gutherzigen Christen bedencken.

Er hette aber wol in seinen Quæstionibus vnd recita-
 tionibus mit seiner alten verlegenen Grammatic mögen das
 heim bleiben/dann zubeforgen/es möchte ihn der Herr Esro-
 mus wider auff's newe inn die Schule führen. Er wil nicht zus-
 geben/das die phrasis: ὅτι καὶ ἕνα τὸν δέξασθαι: ambigua sey/da er
 doch bekennē muß/er könnte den nit decliniren/das zwene Accu-
 satiui darinne gefundē. Wenn nun einer also an Selnecker schrie-
 be/Ego audio appellasse te Iacobum Andream proditorē
 Scholarū & Ecclesiarū: möchte ich wol wissen wie es der Do-
 ctor construiren wolt/Einer der dem Selneccero gut/könte es
 also verstehen/Audio à Selneccero Iacobū Andream ap-
 pellatum esse proditorē Scholarū & Ecclesiarum: Ein an-
 der der gut Jacobitisch/köndts blat umbkehren/Audio ab
 Andrea Selneccerum appellatū esse proditorē. Gleichs-
 fals/wenn die phrasis in actis nicht ambigua wer/wie könten

zweyerley meinung darauß entstehen? Denn es etliche ja so
 auflegen / vnter welchen ich halte auch Selnecker sey: Opor-
 tuisse fieri, vt Christus acciperet cælum: Die anderen aber
 also: Oportuisse fieri, vt Christus cælo caperetur. Es schrei-
 bet aber der Herr Camerarius in explicatione istius loci gar
 fein / mit solchen worten: Sunt autem quidam præposterè
 religiosi, qui indicia ambiguitatis refutant, quod ita ob-
 trectetur doctrinæ sancti Spiritus nequaquam fallaci aut
 dubiæ. Hi tropos quoque & figuras, si sibi constare voluc-
 rint, etiam excludant necesse est. Non sunt autem ambi-
 gua in sacris literis callidè & malitiosè posita, id quod vel
 suspicari, ne dum perhibere, impietatis nefarium crimen
 habeat, sed in expositione orationis communis (quæ fre-
 quentissimè talia vsurpat in omni genere sermonis, tam
 loquendo quàm scribendo) ita ceciderunt. Atque addit
 Camerarius: Nihil aliud dicitur à Petro, quàm in cælo re-
 sidere Christum, & non magis versari in terris. Diese ex-
 plication / die ganz Christlich / vnd in Gottes wort gegründet /
 veracht der hochmütige Doctor / vñ saget / Scripturā non lo-
 qui ambiguè, nec habere flexibilitates Diabolicas: vñnd
 daß er dem guten Gottseligen Herren noch einen backenstreich
 im grabe gebe / Academicum eum nominat, qui incertus
 de vera fide & sua salute fuerit, Denn ob ers gleich in genere
 redt / so sichtet man doch / daß es fürnemlich auff die geht / die da
 sagen / Ambigua in sacris literis reperiri, vnter welchen Cas-
 merarius ist / welcher sich doch fein richtig vñ Christlich erkles-
 ret / wie ers verstanden haben wil / vñd seine wort außdrücklich
 außweisen.

Leslichen / wie er sich mit dem wort *de cælo* wol gemars-
 tert / muß er doch selbst bekennen / daß in Gottes wort gefunden
 werde / Assumptum Christum fuisse in cælum, & à nube sus-
 ceptum. Hat nun den leib Christi eine wolckē können beherbers-
 gen /

gen/ Wie komptes denn/ daß Selneccero die Himmlische wohnung dem Leib Christi nun zu eng scheinet? Aber/ daß ich die Antwort ein mal beschliesse/ Ist das nicht zu belachen/ ja viel mehr mit heissen trennen zu beweinen? Selneck er in allen seinen Schrifften fast durch auß/ schreit vber vns zeter/ daß wir sie Capernaitas, Sarcophagos, Anthropophagos nennen/ vñ beteuere es hoch/ es geschehe ihnen vor aller welt gewalt vñ vnrecht. Nun die warheit zu sagen/ weñ ich an Selneckers stat were/ vñ mich einer also schült/ wüßte ich nit was ich sagen solte/ Den Selneck er wil ja/ dz man dē wahrē leib Christi mündlich esse. Wie nun die mündliche niessung des fleisches von der Sarcophagia kan vnterscheiden werden/ hab ich noch zur zeit/ runde zu bekennen/ nit studirt. Dann daß er für gibet/ es geschehe solches essen supernaturali & caelesti modo, das ist/ vber natürlicher vñ Himmlischer weis/ kan ich nicht ehe glauben/ er beweis mir dann/ daß er einen vbernatürlichen vñ Himmlischen mund habe. Vber das beschweret er sich der absurditeten vñ abschewlichē fragen/ die bißweilen in diesem Streit vorlaufen vñ mouirt werden/ nicht desto weniger helt er steiff an dem grundt/ darauff alle solche absurditeten vñ fragen gebawet. Dann auß der leiblichen gegenwart vñ mündlichen essen/ alle solche grewliche gedanken vñ reden entspringen/ vñ so lang er den quel behelt/ so fleußt das ander hernach/ er stopffe/ fleybe vñ maure wie er wölle/ Sintemal das vnleugbar/ wens ich ein absurdam hypothesin zugebe/ daß darnach vnzelich absurda auß derselbigen könnē geschmidt werden/ wie solches im exempel leichtlich zu sehen.

Wenn mir einer zur neuen zeitung sagt: Selneck er wer Pappst zu Rom worden/ vñ ich glaubt/ es were ihm also/ wie leicht hette er mich darnach zu vberreden/ er hette acht tag nach trium Regum, Nicolaum tertium in einer herrlichen procession das Bisthumb Iohan de Lateron sehen heimfühē/

mit einer grossen anzahl Cardinälen/Bischoffen/Graffen/Edelenten/wie man ihm ein gulden Creuz oder Monstrantz vorgetragen/wie er den segen vber die Caluinisten außgetheilt/vnnd dergleichen? diesem allen müste ich beyfal geben/weil ich das erste concedirt/vnnd glaubet er were Papst. Derhalben die Herren wol zuvor ihre hypothesen erwegen solten/vnnd darnach vber die/von denen in vnrecht geschehen/das zeter geschrey anrichten.

Quaest. 17.

Er setzet selbest eine question / An pars decidatur de corpore Christi, vñ saget/ es seye eine tentelische obiection/vñ gottlos / schweigt aber darneben still/ wer zu solchen fragē anlaß gebe. In vnseren Kirchē/Gott lob/darff man auff solche quaestiones nit respondiren/es mögen die zusehē/die da lehren/man esse den leib Christi mündtlich/so langer am Creuz gehangen. Was einfeltigē Catechumenis auß solcher lehr vor wunderliche gedancken einfallen müssen/ ob sie gleich nicht fragen/ist leichtlich abzunemmen. Aber was seine schöne quaestiones anlanget/vnnd responsiones, die wollen wir anderen zu excus tiren geben/vnter des neme er dise kurze antwort für gut auff/vnd so etwas außgelassen / zuvoraus was die controuersiam selbest anlanget / von der Ubiquitet vnnd mündtlichen essen/mag er sich desselben in der Pfälzischen Theologen admonition/sie seye Teutsch oder Lateinisch/erholen/oder so im dieselben zu gering/der Anhaltischen Theologen Refutation / fürnemlich wider die Ubiquitet/sie sey soluta oder absoluta gestelt / oberlesen / Mir zweiffelt gar nicht/er wirdt inn beyden Schrifften richtiger antwort auff die Quaestiones finden/das wie er etliche auff's Papir geschmirt / auff's heimlichst darvon zureden / so vnachtsam / das zur widerlegung keiner andern wort von nöten/den Selneckers eigen/bey bescheidenen Christlichen herren/den Selneckers selbest zu refutiren/darff's kunst/dieweil seine rede nicht ja ja seynd / vnnd nein nein / nach des

H. R.

HERRN Christi Lehr / sondern zugleich ja vnd nein / Das
 rumb er ohne zweiffel der Regel spottet: *Impossibile est, duas
 contradictorias, in quibus non est ambiguitas, simul ve-
 ras aut simul falsas esse: quare vna parte contradictionis
 recepta, necesse est alteram reijci.* Hec est regula Diuini &
 humani iudicij æterna & immota. Quare prudenter ca-
 uendum est, ne assentiamur contradictorijs. Nam pariter
 recipere contradictoria, est ordinem mentis Diuinæ tur-
 bare, & totam vniuersitatem rerum confundere & euer-
 tere. Diser vnwandelbarn Regel / weil Selnecker wenig acht /
 ja dieselb wol gar veracht / hat er in seinẽ disputirẽ gut göckel /
 vnd wirdt ihn einer nicht leichtlich fangen / er sey so geschwindt
 als er wol / er bring auß Gottes wort zeugniss so viel er wol:
 Christi corpus circumscriptum esse: corpus etiam nunc
 in cælesti illa gloria & mansurum esse circumscriptum in
 omnẽ æternitatẽ: so wird es bey Selnecker wenig helffen / der
 ein andere Regel hat / nemlich / Das ein ding zugleich schwarz
 vnd weiß kan seyn / Ein Leib zu gleich vmbgeschrieben vnd vn-
 endlich / zugleich im Himm̃el vnd auff Erden im runden bröte-
 lein. Mit solcher Regel kan sich Selnecker wol auß arbeitẽ vñ
 durchbrechẽ / weñ er gleich von den Sacramentirern zu Genff
 auffm platz vmbbringer. Dieweil wir aber schuldig für alle ir-
 rende zu bitten / so wollen wir auch den Herrn Doctor in vnser
 gebet einschliessen / Gott dem Allmechtigen flehen / der Vatter
 der Barmherzigkeit wolle sich seiner erbarmen / ihm den nebel
 vñ dunst / von menschlichen affecten vñ vnzeitigẽ eifer erreget /
 mit dem hellẽ liecht seines Euangelij discutiren / das er der Do-
 ctor ein mal in sich selbst gehe / seine grosse sünde erkenne vñ bes-
 weine / so er anders für grosse sünde helt / lesterung vnd schmeht-
 wort / falsche aufflage / verdammung vnschuldiger leut / turba-
 tionem ordinis à mente Diuina introducti, euerfionem
 & confusionem totius vniuersitatis rerum. Wir bitten

E s auch

auch weiter/ es wolle der HERR / der all er menschen herß inn
 seiner handt hatt/ ihn auff den weg bringen / daß er ein mal
 menschliche Titel vnd Namen auß den Augen seze / alle affe-
 cten sincken lasse / vnd in Gottes furcht betrachte / nicht was Lus-
 ther oder Caluinus / nit was Philippus oder Bucerus gelehrt /
 sondern warum am meistē der Streit sey / nemlich Ob der Leib
 Christi allenthalben / vnd Ob man denselben mit dem Munde
 essen solle / Darüber sichtet man ihndt / vñ da neme der Herr
 Doctor Lydium lapidē der heiligen Schrift / nach derselben
 richte er / was von vnseren Kirchen vorbracht / vnd lasse vns
 mit dem namen Lutheri oder anderer Lehrer vnbeschweret /
 dencke ihm auch weiter nach / was doch dieser vnfelige Streit
 inn der Kirchen Gottes gefrommet / was man dardurch ges-
 bawet. Es ist am tag / vnd der Herr Doctor beklagts selbst / daß
 die welt fast nie erger gewesen / Was für sünden vnd schanden
 zu zoten gehen / was für üppigkeit / hoffart / vnzucht / vnflotes-
 rey / füllerey / fast durch auß inn Teutschlandt gemein / ist men-
 niglich bewust / aber die rechte vrsach dieser Confusion / dem
 meisten hauffen verborgen. Der gemeine mann / weil die ges-
 lehrten sich zanken / dencket / er woll der weil ein guten mut has-
 ben / biß der handel ein mal vertragen werde / lebet inn sicherheit
 dahin / verlacht darnebe das Ministerium vnd Kirchendiener /
 vnd wann er ein mal ein gut andacht bekommet / so gehet er zum
 Sacrament / holt alda vergebung seiner Sünden / dencket /
 wann er den Leib Christi mündlich / wie er gelehrt / empfangen /
 es kan ihm nicht fehlen / er sey aller sorgen frey / ober drey tag ist
 die andacht auß / sehets wider an / da ers gelassen hat. Das dem
 allen so sey / wirdt Selnecker selbst nicht leugnen. Derhalben
 vns fast so gehet / wie es zwo partheyen / die mit einander vmb
 ein Gut oder Haus rechten / Ein jede part gedencet / wie sie das
 ihre mit recht erhalte / braucht alle menschliche mittel / vnd
 trachtet auff nichts anders / dann wie sie das feldt behalte / vnd
 das

das ander theil abstoffe/vnter des gehet das gebewe ein/das feid
 wirdt nicht beschicket/das Gesinde treibt allen mutwillen/weil
 es kein gewissen Herren/vnd wenn es nun ein mal zum vertrag
 kommen/ist das Gut schier gar verwüstet/vnd haben beyde
 part nichts mehr darvon denn den schaden/vnd den spott dar
 zu.Gehet es in der Christlichen Kirchen nicht auch so zu? Was
 ist aber nun die schuld? Wir bieten jedermenniglichen vertrag
 an/man lasse vns nur zur verhörung kommen/vnd setze vns
 Competentes Iudices. Was thun aber vnser widersacher?
 dieweil sie faule Sach/so schieben sie es auff wie sie könnē/das
 ja das letzte vrtheil nicht ergehe/bringen sonderlich befehl auß/
 appelliren zu Hoff/oder/wie die Juristē besser darvon zu reden/
 brauchen andere künstlein/das ja nit der handel rechtmessiger
 weiß möge erörtert werden/Welches wir Gott dem Allmecht
 igen befehlen müssen/der wirdt zu seiner zeit seine betrübte
 Kirchen ansehen/vnd nach seinem Göttlichen willen
 alles seinen Aufferwehlten zum besten
 lehren/Amen.



Faint, illegible text, likely bleed-through from the reverse side of the page. The text is arranged in several lines and is mostly obscured by the paper's texture and the scanning process.




AB: 153865 (1)

ULB Halle 3
002 632 004



SP







Kurze Antwort
auff
Doctoris Selnetteri
Eiederlich Tractetlein / das ohns
langst wider Danæum vnd Iofuam
Lagum außgangen.

Gesetzt
Durch Paulum Schönhouium.

Prou. Salom. Cap. 14. ver. 5.
Ein trewer Zeuge leuget nicht / aber ein falsche Zunge
redet dürstiglich lügen.



Bedruckt zu Newstatt an der Hardt / durch
Mattheum Harnisch.
1 5 8 1.

